



www.khiv.ru/pressa

АКУ ХЯД

СВЕТЛАЯ ЗВЕЗДА

Хив райондин жямаятдинна сиясатдин газет

№ 43(5601)

28-ти октябрь, 2019-ти йис

Газет гыфтайы сабан удубчівура

Кыमत 3 манатна 68 кепек



Райондин
администрацияйы

Райондин улихь дийигънайи месэлийр виривирд гьапну

2019-пи йисан 21-пи октябрь райондин администрацияйин конференц-зали райадминистрацияйин нубатнан совещание гьабхьну. Дидин ляхний райадминистрацияйин жавабдар гьуллугъчири, районцентриин али идарийрин, тешиктарин руководителари иштирак гьапну.

Совещание «Хивский район» МО-ийн администрацияйин глава Ярмет Ярметовди ачмиш гьапну ва кюлира гьубхну. Совещаниеийин райондин улихь дийигънайи саб жерге месэлийр виривирд гьапну.

Совещаниеийин эвели Ярмет Алиматовичди 19-пи октябрь их райондин делегацияйи Сулейман-Стальский район тешил гьапхъанмина 90 йис тамам хьупаз тьлукь дапнайи шадвалин серенжемари иштирак гьапнувалекан, 20-пи октябрь их райондиз Цийи Захтарин гьула диврайи мектебдин ляхнар фици кюли гьагъюраш ахтармиш апбан ният ади РД-ийн министройин министрин заместель Ризван Усманович Мурадов гьафиваликан, мектеб дивран подрядчик тьяин апбан конкурс кюли гьубшувалекан, подрядчик мялум духънайиваликан ва багарихьди мектеб дивбахь хьогърувалекан чав миж киврайиваликан гьапну.

Хьасин совещаниеийин гьулху муниципальный жилин гюзчивалин, жилин аьлакыйрин ва гьулан мяшадтин отделин начальник Байрамбег Кучувди гьуларин поселенйири 32 участкади ТБО (твердый бытовой отходар) уч апуру контейнерар дивру ийшар дюзмиш дапнайиваликан, думу участкарин саб пайназ КПТ (кадастровый план территории) чихьна хьубкнайиваликан, дурарин схемйирра айиваликан, дурар 10 йигъандин арайиь учетдин диврувалекан ва хьасин кадастровый паспортарра гьадагъру мумкинвал шувалекан гьапну. Байрамбег Адаевичди чан улбарий гьацира райондин гьулан мяшадтин карханири галин участкарин 900 гектари изнар дапну чвлин мягъсуларин тумарра дурнайиваликан, 2-3 йигъандин арайиь хьанара 150 гектари тумар алахьрувалекан ва чвлин тумар урзан план районди артухьра алди таман апурувалекан, галин участкари ятгар, маддарарин хулар ремонт апурувалекан, райондин аьтрафариин али жилин участкари ГКО (государственная кадастровая оценка) тубаз тьлукь вуйи месэлийнакн мялумат тувну.

РОО-ийн начальнидин заместитель Магомедшериф Садыковди райондиз аий ийтмар вуйи бааршубар яшайишдин хуларихьди тьяин апбан месэла гьал апуруйи гьалнакан, мектебарий класс-компектар дюзмиш дапнайиваликан, мялимари тарификация турвайиваликан ва штатный расписание дюзмиш дапну ккудубнайиваликан ктитну.

Райадминистрацияйин главини заместитель Мирзабег Багичевди октябрин вазли АТК-ийн заседанияйин гьал апбанди вуйи месэ-

ийрин план дюзмиш дапнайиваликан, гьуларий АТК-ийн кьаррар таман апуруйи гьал ахтармиш гьапнувалекан, «Зашита» ччур али комплексный межведомственный оперативно-профилактический операцияйин плановый серенжмар давам апуруйиваликан гьапну.

Культураийн, спортдин, жигьиларин политикайин ва туризмийн отделин начальник Казбек Казиевди культураийн маканарин гьуллугъчири 19-пи октябрь Сулейман-Стальский райондин 90 йисандин юбилейиьра иштирак гьапнувалекан, щийин йис театрин йис вуйивал гьисабназ гьадабгьну, 21-пи октябринлан 31-пи октябризкан культураийн маканарин гьуллугъчири райондин гьуларий концертар, сценкиир улупрувалекан, Табасаранский Государственный драмтеатрин коллективди их райондиз «Ич вахтар» ччур али театр улупрувалекан хабар тувну.

Финансарин ва налогарин отделин начальник Абдулгамид Беговди октябрин вазин маважибдин пулар вари идарийриз хьадапнайиваликан, щийин йицуб вазин доходариин вуйи план 15-пи октябризкан 93 процентдин таман дапнайиваликан, НДС гьар ваз ктабхьз йигъар ккмиди идарийрин райондин бюджетдиз хьтапури гьахьш, ужу шувалекан гьапну.

ЖКХ-ийн, архитектураийн ва тикилишчвалин отделин начальник Гаджибала Ибрагимовди «Хоредж-Хив» водоводдин 4 километрийн манзилна архар адатну турбийра кивнайиваликан, водоводдин 15 касди ляхин апуруйиваликан, гьюру гьафтайиь сабпи каптаждин ляхнарихь хьогърувалекан хабар тувну.

«село Хив» гьулан поселениеийн главини вазифийр вахтнинди таман апуруйи вуйи Фахрудин Рамазановди «Хоредж-Хив» водоводдин кюли гьахурайи бязи ляхнари гьакнаан чан фикрар гьапну, думу ляхнариь бязи дюз даруваларра айиваликан гьапну.

Агул ва Хив районрин военный комиссар Пирмагомед Кубачевди чли РФ-ийн армияйин жергийриз 10 кас гьапнайиваликан ва му ляхин давамра шулайиваликан ктитну.

Совещаниеийин гьацира экономикайин отделин начальник Гаджибег Рамазанов, УСЗН-дин начальнидин заместитель Тигран Каибханов, ЦСОИ-дин директорин заместитель Пирмагомед Гасанов ва жара олдшар гьулху. Дурари чпин коллективари кюли гьахурайи ляхнарикан жикъи информацияй тувну.

Совещаниеийин Ярмет Ярметовди улубкнайи гьафтайиь бязи руководителари таман дапну ккни ляхнарикан гьапну ва дурариз кьатг и табшургар тувну.

Пресс-центр.

Саб вуйи информацияйин йигъ

2019-пи йисан 17-пи октябрь райадминистрацияйин актовый зали райондин активдихьди саб вуйи

Чан докладди Магомед Ризахановди Дагьустан Республикайиь, их Республикайин Главади



информацияйин йигъ кюли гьубхну.

Му серенжм «Хивский район» МО-ийн администрацияйин глава Ярмет Ярметовди ачмиш гьапну ва кюлира гьубхну.

Серенжм ачмиш апури Ярмет Алиматовичди Дагьустан Республикайин Главини багахь тешил дапнайи Дагьустан Республикайин старейшинайин Советди 2019-пи йисан 17-пи октябрь Дагьустандин Республикайин вари шагьрариь ва районариь «О деятельности Главы Республики Дагестан Владимира Васильева по оздоровлению травмированного общества Дагестана» темайин саб вуйи информацияйин йигъ кюли гьабхан гьакнаан кьарар кьабул дапнайиваликан ва их райондиз му темайин докладар апбан бадали Дагьустандин Республикайин старейшинайин Советдин член Магомед Ризаханов ва Дагьустан Республикайин Халкьдин Собраниеийн депутат Нариман Асваров дунфнайиваликан гьапну ва райондин активдин улихь улбан бадали сифте гаф Магомед Ризахановдиз тувну.

Владимир Васильев ктагьбалан кьаллахь, халкьдин мяшадтин жорбежур циркларий, образованиийн, медицинайин, тикилишчвалин ва жара месэлийр гьал апбав, маважибар за апбав, гьуллугъарин кадрий дерккбан ляхний, агьалирин хатласузвал уьбхба арайиз дунфнайи дигиш валарикан, образованиийн ва жил мянфьялуди ишлетмиш апбан жигьатнаан имбу камиваларикан ва думу месэлийр гьал апбан рьякьрикан гьапну.

Райондин активдин улихь гьулху Нариман Асваровди ва Хив райондин старейшинайин Советдин председатель Тажудин Мурадхановди их улкьейин образованиийн системайикан, образованиийн жорбежур программийр айиваликан, аьжо шулайи наслиз дерин аьгьувалар тувбан жигьатнаан абийр-бабарин, мялимарин улихь дийигънайи вазифириккан гьапну.

Серенжмдин аьхирий Ярмет Ярметовди райондин активдихьди гюрошмиш гьахь хьлариз чухсагъул гьапну.

Пресс-центр.

2020-пи йисандин бегьер бадали

Райондин «Аку хяд» газетдин редакцияйиз «Хивский район» МО-ийн администрацияйин муниципальный жилин гюзчивалин, жилин аьлакыйрин ва гьулан мяшадтин отделин начальник Байрамбег Адаевич Кучувди хабар турвайиганси, 2020-пи йисандин бегьер бадали цци райондин общественный мяшатарий чвлин мягъсуларин тумар алахьбан бадали райондиз РД-ийн гьулан мяшадтин ва продовольственной министерствойин 1015 гектарин план улупна.

Му планна гьисабназ гьа-

дабгьну, райондин мяшатарари вари сабишвлан гьадабгьган 1115 гектари чвлин мягъсуларин тумар алахьбади ву.

Райондин саб жерге мяшатар, гьадму гьисабнаан вуди «Юзбековский», «Родина», «Ляхлинский», «Ново-Кандык» СПК-ийр, ООО «Ярак» ва жара мяшатар вахтнинди изнар апбан ва тумар алахьбан техника гьазур апбан гьайгьушна гьахьну.

Гьамци, гьавайин ужудар шартлариканна мянфьял кадабгьну,

(Аьхир 2-пи машина)

